



NEWSLETTER BR. 33

SEPTEMBAR 2017

SADRŽAJ

FIPA AKTIVNOSTI ≡

- » Predstavnik FIPA-e u Japanu u posjeti BiH
- » FIPA: Bosna i Hercegovina po prvi put predstavljena na najvećem sajmu turizma u Japanu
- » FIPA: Njemačka zauzima 7. mjesto po visini ulaganja u BiH
- » FIPA – ICE : Zajednički rad na privlačenju italijanskih investitora
- » FIPA-Općina Kozarska Dubica : Pružanje podrške investitorima ključna za njihov dolazak i širenje
- » Iranski ambasador u BiH posjetio FIPA-u
- » Direktor FIPA-e učestvovao na Američkom biznis forumu za promociju i umrežavanje (U.S. Business Promotion and Networking Forum)
- » Promocija investicionih potencijala BiH investitorima u Bavarskoj
- » Posjeta stranim kompanijama u BiH
- » Posjeta FIPA-e kompanijama u Lukavcu
- » FIPA dovela investitora za Rudnik i TE Kamengrad (Sanski Most)
- » Posjete kompanijama u Tuzla kantonu

POSLOVNE VIJESTI ≡

- » Švicarska kompanija će graditi pogon na Ilidži kod Sarajeva
- » Trade Winds Forum – jugoistočna Europa 2017
- » Sedmica izvoza u Istanbulu



POZIV ZA UČEŠĆE NA MEĐUNARODNOJ KONFERENCIJI O REGIONALNOM TRŽIŠTU, RAZVOJU STATISTIKE I MOGUĆNOSTIMA INVESTIRANJA



Agencija za unapređenje stranih investicija u Bosni i Hercegovini, Savez nevladinih organizacija Horizont 2024, Agencija za statistiku Bosne i Hercegovine, Vanjskotrgovinska komora Bosne i Hercegovine i drugi partneri iz regije (Srbija, Hrvatska, Crna Gora, Turska) i EU, organiziraju Međunarodnu konferenciju o regionalnom tržištu, razvoju statistike i mogućnostima investiranja, koja će se održati od 06. do 08. novembra 2017. godine u Sarajevu.

Ovo je jedna od najznačajnijih konferencija u regiji koja podržava suradnju vladinih institucija, međunarodnih organizacija, poslovnog sektora, akademske zajednice i nevladinih organizacija sa namjerom stvaranja boljeg poslovnog okruženja, razvoja tržišta i konkurentnosti, kao i zajedničkog planiranja i realizacije regionalnih projekata. Konferencija afirmira mogućnosti regionalnog investiranja, promovira značaj statistike, informacionih tehnologija i razvoja u oblastima industrije, tržišta kapitala, rada, poljoprivrede, energije i turizma.

Konferencija je organizovana u četiri panela: panel tržište, panel investicije, panel statistika i panel istraživanje i razvoj. Panele moderiraju i koordiniraju predstavnici organizacija iz Bosne i Hercegovine, Republike Turske, Republike Srbije, Republike Hrvatske, Republike Crne Gore i dr. Na konferenciji će prisustvovati predstavnici investicijskih fondova, privrednih i vanjskotrgovinskih komora, berzi, ambasada, institucija za investicije, univerziteta, međunarodnih organizacija, kompanija, kao i drugih vladinih i nevladinih organizacija.

Na konferenciji će biti predstavljeni odabrani projekti i istraživački radovi iz ekonomsko-socijalnih oblasti, kao i izložene mogućnosti zajedničkog učešća kompanija iz regije na međunarodnom tržištu.

Učesnici će imati i posebnu priliku da se upoznaju sa efikasnim načinima poslovanja, najnovijim poslovnim trendovima i načinima apliciranja za sredstva EU fondova.

Sve informacije o konferenciji i prijavi učešća možete pronaći na web portalu www.forumtis.net ili kontaktirati na tel.: + 387 33 217 391; mob.: + 387 61 011 198 i e-mail: info@forumtis.net

FIPA AKTIVNOSTI ≡



PREDSTAVNIK FIPA-E U JAPANU U POSJETI BiH



FIPA: BOSNA I HERCEGOVINA PO PRVI PUT PREDSTAVLJENA
NA NAJVEĆEM SAJMU TURIZMA U JAPANU ≡



...I JOŠ FIPA AKTIVNOSTI...



PREDSTAVNIK FIPA-E U JAPANU U POSJETI BIH



Predstavnik FIPA-e u Japanu Shigehiko Nishihama posjetio je Agenciju kako bi informirao rukovodstvo o aktivnosti koje provodi sa ciljem promocije BiH kao investicione i turističke destinacije za japanske investitore i turiste, aktivnosti na izvozu bh. vina u Japan, te na održavanju kontakata sa japanskim privrednicima koji su po prvi posjetili BiH prošle godine. G. Nishihama je na nedavno održanom najvećem japanskom sajmu turizma Tourism EXPO u Tokiju od 21. do 24. septembra 2017. godine predstavio Bosnu i Hercegovinu kao turističku destinaciju gdje je održao veliki broj prezentacija pred značajnim brojem posjetilaca i turističkih predstavnika iz Japana. Turističke agencije iz Japana su zainteresirane da turističke ponude koje nude svojim klijentima, pored Sarajeva i Mostara, obogate posjetama Trebinju, Višegradu, Jajcu i Jablanici. Kako je potvrdio g. Nishihama, 6.000 turista iz Japana posjeti BiH godišnje, od čega 5.000 dolazi organizirano preko putničkih agencija, dok 1.000 turista dolazi individualno.

U okviru posjete BiH, u pratnji predstavnika FIPA-e, g. Nishihama će posjetiti nosioce investicionih projekata u Bosanskom Brodu i Prijedoru, kao i nove investicione lokacije, s obzirom da postoji interes japanskih investitora za ulaganjem u ovom dijelu BiH. Također će posjetiti Višegrad, Jablanicu i Jajce radi pripreme promotivnih aktivnosti. Ističemo činjenicu da je zahvaljujući naporima i radu g. Nishihama započeo izvoz bh. vina u Japan, što predstavlja značajan iskorak u izvozu bh. proizvoda na veoma zahtjevno japansko tržište.

Po povratku u Japan, posjetit će japanske firme koje su bile u posjeti BiH u 2016 radi razgovora o mogućnostima investiranja, kako bi se upoznao sa planovima vezanim za njihova ulaganja u BiH.



FIPA: BOSNA I HERCEGOVINA PO PRVI PUT PREDSTAVLJENA NA NAJVEĆEM SAJMU TURIZMA U JAPANU



Predstavnik FIPA-e u Japanu Shigehiko Nishihama predstavio je Bosnu i Hercegovinu na najvećem sajmu turizma u Japanu Tourism Expo Japan 2017 koji je održan u Tokiju od 21. do 24. septembra 2017. godine.

Bosna i Hercegovina je na sajmu predstavljena u okviru zajedničkog izložbenog prostora pod sloganom „Balkan - Your Next Destination in Europe“ zajedno sa Albanijom, Crnom Gorom, Makedonijom i Srbijom, u organizaciji Japanske agencije za suradnju JICA koja je također osigurala promotivne brošure prevedene na japanski jezik.

Tokom četiri dana sajma, predstavnik FIPA-e g. Nishihama zajedno sa predstavnicima bh. ambasade u Tokiju je održao veliki broj prezentacija o Bosni i Hercegovini kao turističkoj destinaciji pred velikim brojem posjetilaca i predstavnika turističkih agencija Japana, koji su pozitivno reagirali na predstavljanje Bosne i Hercegovine. Tokom četiri dana održavanja, sajam je posjetilo više od 150.000 posjetilaca.

Uskoro će g. Nishihama započeti pregovore sa nekoliko turističkih agencija Japana o organiziranju posjeta BiH u sklopu posjeta susjednim zemljama. Također će u suradnji sa bh. ambasadam u Tokiju nastaviti raditi na turističkoj promociji BiH na japanskom tržištu, s obzirom na dobre odnose koje ima sa predstavnicima turističke industrije Japana. Trenutno 6.000 turista iz Japana posjeti BiH godišnje.

Također, ističemo činjenicu da je zahvaljujući naporima i radu g. Nishihama započeo izvoz bh. vina u Japan, što predstavlja značajan iskorak u izvozu bh. proizvoda na veoma zahtjevno japansko tržište.



FIPA: NJEMAČKA ZAUZIMA 7. MJESTO PO VISINI ULAGANJA U BIH



Direktor Agencije za unapređenje stranih investicija BiH (FIPA) Gordan Milinić informirao je rukovodioca Ekonomskog odjela ambasade SR Njemačke u BiH Sebastiana Damma o nadležnosti FIPA-e, aktivnostima koje provodi na promociji zemlje i investicionih projekata, te pružanju podrške stranim investitorima od registracije firme do implementacije projekta.

Govoreći o promotivnim aktivnostima, istakao je da je FIPA tokom 2017 realizirala nekoliko posjeta njemačkim kompanijama u okviru Outreach kampanje u Minhenu, da je učestvovala na poslovnim susretima u Berlinu, ističući nadolazeću posjetu sajmu Expo Real Minhen od 4. do 6. oktobra 2017, te privredne susrete sa njemačkim investitorima planiranim za kraj oktobra u Štuttgartu.

Što se tiče rezultata Outreach kampanje koja je bila fokusirana na prezentiranje mogućnosti za ulaganje u poljoprivrednom sektoru BiH, najavljena je posjeta njemačkog investitora BiH radi razgovora o investiranju. Kada je riječ o sajmu Expo Real Minhen, dogovoreni su sastanci sa njemačkim privrednicima i investitorima radi razgovora o mogućnostima ulaganja u BiH.

Njemačka zauzima 7. poziciju po visini ulaganja u BiH sa uloženi 560 miliona KM, a među najznačajnije njemačke investicije spadaju Heidelberger Zement AG-Tvornica cementa d.d. Kakanj, Messer Gresheim Haft., te Xella International.

FIPA će pojačati promotivne aktivnosti prema njemačkim investitorima u suradnji sa ambasadom Njemačke u BiH.



FIPA – ICE : ZAJEDNIČKI RAD NA PRIVLAČENJU ITALIJANSKIH INVESTITORA



Direktorica Ureda agencije za vanjsku trgovinu Italije u BiH (ICE) Margherita Lo Greco posjetila je FIPA-u kako bi se informirala o trenutnoj situaciji kada je riječ o prilivu italijanskih investitora u BiH, trenutnoj suradnji FIPA-e sa italijanskim investitorima, te trenutnoj realizaciji projekata i ostvarenih kontakata sa potencijalnim investitorima. Direktor FIPA-e Gordan Milinić je istakao da se Italija nalazi na 8. poziciji sa uloženi 556 miliona KM u različite sektore bh. privrede, te da je intenzivirana suradnja na uspostavljanju kontakata sa potencijalnim investitorima iz Italije tokom 2016 i 2017, o čemu svjedoči Outreach kampanja iz maja 2017, te posjeta Macfrut sajmu u 2016 i 2017, kada su ostvareni značajni kontakti s italijanskim privrednicima.

Dugi niz godina FIPA uspješno surađuje sa Uredom ICE u Sarajevu na promociji bh.mogućnosti za ulaganja, te je aktivni učesnik privrednih manifestacija koje ICE organizira sa ciljem povezivanja privrednika i uspostavljanja kontakata. Planirano je održavanje privredne manifestacije krajem novembra u Milanu na kojem bi se trebala predstaviti i Bosna i Hercegovina sa svojim potencijalima.



FIPA-OPĆINA KOZARSKA DUBICA : PRUŽANJE PDRŠKE INVESTITORIMA KLJUČNA ZA NJIHOV DOLAZAK I ŠIRENJE



27. septembra 2017, predstavnici FIPA-e posjetili su Općinu Kozarska Dubica kako bi sa nadležnim predstavnicima na čelu sa načelnikom Radenkom Reljićem razgovarali o podršci koju dvije institucije pružaju stranim investitorima sa ciljem privlačenja novih investitora i širenja postojećih.

Općina Kozarska Dubica pruža besplatne administrativne usluge stranim investitorima, te dodjeljuje službenika svakom novom investitoru, koji prati investitora kroz sve faze investiranja radi brže realizacije investicije. Ovaj vid rada sa stranim investitorima je neophodan ukoliko se žele privući novi investitori, a postojeći potaknuti na širenje poslovanja.

Posjeduje mogućnosti za ulaganje u prehrambenu industriju, drvoprerađivačku i tekstilnu industriju.

Najznačajniji investitori na ovom području dolaze iz Italije, koji zapošljavaju 330 radnika, Velike Britanije 50 radnika, te Njemačke. Neke od značajnijih kompanija su: Mlijekoprodukt, najveća mljekara i centar mljekarske industrije u BiH, Dubicotton, najveća fabrika za preradu pamuka u jugoistočnom dijelu Europe, potom sjedište kompanije Zepter BiH, te Nova Mehanika, najveća fabrika poljoprivrednih priključaka u BiH, Dempson Bosna doo, koja se bavi proizvodnjom papirne ambalaže i prva je 100% direktna strana investicija u Kozarskoj Dubici, itd.

Sastanku su prisustvovali i investitori iz Mađarske sa kojima je FIPA uspostavila kontakte, a koji su zainteresirani da ulažu u ovom dijelu Bosne i Hercegovine.



IRANSKI AMBASADOR U BIH POSJETIO FIPA-U



Direktor Agencije za unapređenje stranih investicija BiH (FIPA) Gordan Milinić primio je ambasadora Islamske Republike Iran u BiH N.J.E. Mahmouda Heidarija kako bi razgovarali o mogućnostima suradnje na povećanju iranskih investicija u BiH, povezivanju iranskih investitora sa nosiocima projekata u BiH, te povezivanju privrednika dviju zemalja radi jačanja izvoza.

G. Milinić je informirao ambasadora Heidarija da u BiH nema iranskih investicija, te da se nakon ukidanja sankcija očekuje i dolazak prvih investitora iz Irana, s obzirom da BiH nude velike mogućnosti za strana ulaganja, te da BiH računa na investicije iz ove prijateljske zemlje. Privredni odnosi su na niskom nivou i oni ne prate dobre političke i kulturne odnose. Ambasador je informiran o sektorima koji bi mogli biti interesantni iranskim investitorima, statusu stranih investitora u BiH, trenutno raspoloživoj bazi investicionih projekata koja broji više od 200 projekata, te spremnosti i raspoloživosti FIPA-e da surađuje sa investitorima na upoznavanju sa uvjetima za ulaganje i implementaciji projekata. Govoreći o zainteresiranosti bosansko-hercegovačkih privrednika za suradnju sa Iranom, direktor Milinić je spomenuo sastanak koji je održan u FIPA-i sa predstavnicima Global Ispat Koksne Industrije d.o.o. Lukavac (GIKIL), kao i nadležnim ministrom energetike Tuzlanskog kantona, koji su iskazali želju za ponovnim uspostavljanjem suradnje sa iranskim kompanijama sa kojima su surađivali u periodu prije sankcija. Ambasador Heidari je istakao spremnost da radi zajedno sa FIPA-om na povezivanju privrednika dvije zemlje, pri tome navodeći vizni režim BiH koji usporava proces povezivanja privrednika. Također je istakao da se o Bosni i Hercegovini vrlo malo zna u Iranu, te su u ovom smislu predložene aktivnosti koje će u bliskoj budućnosti doprinijeti širenju informacija o BiH na ovom imponantnom tržištu. Predloženo je potpisivanje MoU radi jače suradnje nadležnih institucija u sferi stranih ulaganja, te je istaknuta potreba za većim prisustvom bh. predstavnika na privrednim manifestacijama koje se održavaju u Iranu radi promocije zemlje.



POSJETA STRANIM KOMPANIJAMA U BIH



U okviru Aftercare programa za 2017. godinu, 12.09.2017. godine, održan je sastanak sa direktorom kompanije Atiker d.o.o., Refikom Nedžićem, i direktorom prodaje, Advijom Hadžić. Sastanku je prisustvovao i Admir Aljić, predstavnik Općine Živinice.

Grupacija Atiker Metal iz Turske, vlasnik kompanije Atiker d.o.o., se bavi proizvodnjom i ugradnjom plinskih auto sistema, te njihovim servisiranjem. 100% je strana investicija i sa radom je počela 2013. godine u Živinicama.

Trenutno zapošljava 18 radnika. Ukupne investicije do sada su iznosile 1.75 miliona eura. Imaju 3 centra u BiH, a planu je otvaranje još 3, što bi značilo 30 novih radnih mjesta. Predstavnici kompanije su ukazali na potrebu izmjene pravilnika o atestu za plinske rezervoare, kao i izmjenu zakonskih rješenja koja regulišu ovu oblast.

Obavljena je i posjeta kompaniji Sućo d.o.o. Sastanak je održan sa Ernom Mujčinović i šefom proizvodnje, Muharemom Čamdžićem, a sastanku su prisustvovali i predstavnici Općine Živinice, Admir Aljić i glasnogovornik, Alma Suljkanović.

Kompanija Sućo d.o.o. je usko specijalizirana za izgradnju vatrogasnih kamiona i cjelokupna proizvodnja je namjenjena za izvoz. Kompanija Lentner GmbH i direktor firme Sućo d.o.o., Suad Bešlić, su vlasnici kompanije sa jednakim učešćem (50:50). Kompanija je počela sa radom u BiH krajem 2016. godine. Trenutno zapošljavaju 15 radnika. Početna investicija je iznosila 500.000 eura. Planiraju zaokruženje procesa proizvodnje i dodatno ulaganje od 1,5 - 2 miliona eura, kao i zapošljavanje još 100 radnika, različitih obrazovnih profila. Svečano otvaranje fabrike je zakazano za 22. septembar 2017. godine.



PROMOCIJA INVESTICIONIH POTENCIJALA BiH INVESTITORIMA U BAVARSKOJ



Direktor Agencije za unapređenje stranih investicija u BiH (FIPA) Gordan Milinić održao je u FIPA-i sastanak sa generalnom konzulicom Bosne i Hercegovine u Minhenu Ruzmirom Tihć Kadrić.

Na sastanku je razgovarano o mogućnostima unapređenja ekonomske i investicione saradnje sa njemačkim kompanijama bavarske regije. Kako je istakla konzulica Tihć Kadrić, postoji iskazan interes i ogromni potencijali za privlačenje njemačkih investitora u BiH, posebno kada su u pitanju sektor metalne i drvne industrije.

Na sastanku je dogovoreno intenziviranje aktivnosti svih bh. institucija na pripremi promotivnih materijala i investicionih projekata koji bi bili predstavljeni njemačkim investitorima u Bavarskoj. Planirane su naredne aktivnosti FIPA-e i Generalnog konzulata BiH u Minhenu, uz istaknutu otvorenost za saradnju sa predstavnicima Privredne komore Bavarske i organizaciju sastanaka njemačkih i bosansko-hercegovačkih privrednika.



DIREKTOR FIPA-E UČESTVOVAO NA AMERIČKOM BIZNIS FORUMU ZA PROMOCIJU I UMREŽAVANJE (U.S. BUSINESS PROMOTION AND NETWORKING FORUM)



Ambasada SAD-a u Bosni i Hercegovini i Američka privredna komora u BiH (AmCham) organizirali su 22. septembra 2017. godine u Banja Luci Američki biznis forum za promociju i umrežavanje (U.S. Business Promotion and Networking Forum). Tom prilikom direktor FIPA-e gđin Gordan Milinić je učestvovao na panelu „Strategic Outlook & Priorities from BiH Chambers and Associations“. Ovo je prvi događaj ove vrste u BiH koji organizira Ambasada SAD, i predstavlja odličnu priliku za uspostavljanje kontakata sa američkim kompanijama, za upoznavanje sa svim programima podrške Vlade SAD i američkih kompanija i organizacija koji su na raspolaganju.

G. Milinić je u toku panela „Strategic Outlook & Priorities from BiH Chambers and Associations“ upoznao prisutne sa uslugama koje FIPA nudi potencijalnim i postojećim investitorima, osnovnim izazovima sa kojima se BiH suočava u privlačenju stranih investicija, kao i prednostima BiH za ulaganje.

Na forumu su ostvareni kontakti sa predstavnicima investicionog fonda KKR (Telemach), investicionog fonda Advent International (Addiko banka), te kompanijama General Electric, Marriott, Becton Dickinson, NCR, Lanaco i mnogim drugim.



POSJETA FIPA-E KOMPANIJAMA U LUKAVCU



Predstavnici Agencije za unapređenje stranih investicija BiH (FIPA), Općine Lukavac i Ministarstva za industriju, energetiku i rudarstvo, te Ministarstva razvoja i poduzetništva TK, posjetili su Fabriku cementa, Sisecam Soda i FEN-BH Lukavac.

Sa čelnim ljudima ovih kompanija razgovarali su o mogućnostima dodatne podrške u unapređenju poslovanja. Posjeta je dio Aftercare projekta-postinvesticione podrške investitorima, te projekta poboljšanja poslovnog okruženja i konkurentnosti u BiH.



FIPA DOVELA INVESTITORA ZA RUDNIK I TE KAMENGRAD (SANSKI MOST)



Direktor Agencije za unapređenje stranih investicija BiH (FIPA) Gordan Milinić primio je delegaciju firme Energy China Group na čelu sa podpredsjednikom grupacije Yu Gangom, delegaciju kompanije China Energy Engineering koju su predstavljali predsjednik Dong Bin i zamjenik direktora Zuo Zhong, kao i predstavnike kompanije Lager Posušje na čelu sa izvršnim direktorom Draganom Stipićem sa saradnicima, koji je vlasnik projekta Rudnik i TE Kamengrad.

Ovo je bio četvrti po redu sastanak sa kineskom delegacijom na kojem se razgovaralo o navedenom projektu. S obzirom da postoji visok stepen saglasnosti između investitora i nosioca projekta o realizaciji investicije, dogovoreno je da tehnička ekipa iz Kine posjeti Kamengrad u narednih deset dana kako bi sa vlasnicima projekta dogovarali tehničke detalje oko realizacije projekta, nakon čega će uslijediti potpisivanja konačnog sporazuma o realizaciji investicije.

Direktor Milinić je ostvario kontakt sa navedenom kompanijom početkom ove godine u cilju realizacije investicije u projekat Rudnika i termoelektrane Kamengrad snage 2 X 215 MW.

Vlada FBiH na 59. sjednici Vlade u 2016 donijela odluku kojom izgradnju Termoelektrane u Sanskom Mostu svrstava u strateški projekat u energetici u Bosni i Hercegovini. Uz kapitalnu investiciju od 1.020.000.000 KM, pokretanje proizvodnje Rudnika i proizvodnja električne energije TE Kamengrad će predstavljati jednu od najvećih investicija u BiH.

Realizacija ovog strateškog projekta će doprinijeti u velikoj mjeri ekonomskom razvoju kako lokalne zajednice, kantona, tako i Bosne i Hercegovine, te će imati veliki uticaj na zapošljavanje.



POSJETE KOMPAIJAMA U TUZLA KANTONU



U okviru Aftercare aktivnosti, 29.08.2017. godine, predstavnici Agencije za promociju stranih investicija u BiH (FIPA), predstavnici Grada Tuzla i Ministarstva razvoja i poduzetništva Tuzla kantona posjetili su firme koje posluju na području Tuzlanskog kantona u različitim sektorima: tekstil i obućarska industrija, metalna industrija, distribucija i trgovina, te sektor edukacije i nadzora nad mašinskom obradom putem programiranja savremenih robota u proizvodnji. Firma MBT doo Tuzla, sa osnivačkim kapitalom iz Njemačke, planira i pokretanje vlastite mašinske obrade, trgovanje polovnim industrijskim robotima, te uvođenje usluge offline programiranja za strana tržišta.

Importal Diffusion doo se bavi proizvodnjom PVC stolarije, sa porijeklom kapitala iz Francuske. Firma izvozi svoje proizvode na EU tržište, prije svega u Francusku i Njemačku. Progetti Bosnia doo Tuzla, se bavi lon poslovima za najpoznatije svjetske brendove, a imaju u planu nova veća ulaganja i nova zapošljavanja. Propak doo Tuzla, čiji osnivač je iz Hrvatske, se bavi distribucijom i trgovinom ambalaže za hranu. Ove četiri firme zapošljavaju preko 250 zaposlenih i imaju u planu dalje širenje. Ono što su predstavnici firmi izdvojili kao otvorena pitanja odnose se na poteškoće oko počinjanja poslovanja, skupe troškove notara i drugi, diskriminaciju stranih investitora prilikom prijave na konkurse, poteškoće koje se odnose na porez na dodatnu vrijednost, duge administrativne procedure, sporost u naplati potraživanja, procedure vezane za dobijanje različitih vrsta dozvola, usluge bankarstva, visoke kamate i općenito pitanje finansijskih usluga. Također, naveden je i problem kriterija i načina apliciranja na javni poziv Federalnog zavoda za zapošljavanje, na čijem rješavanju treba raditi. Nadalje, postoji i potreba za firme koje posluju u poslovnoj zoni/inkubatoru Lipnica da se riješi pitanje produženja ugovora između Grada Tuzla i Vlade Federacije BiH u što skorijem roku. Ka da je u pitanju poslovna zona Kreka-Sjever, ona pruža odlične uvjete za poslovanje privrednicima i predstavlja sjajnu priliku za investitore. Pravo građenja na ovoj lokaciji dobilo je već 5 firmi na 40 godina. Zakupnine su veome povoljne, početna cijena iznosi 0,008 KM/m². U ovoj poslovnoj zoni postoji prostor za dodatnih 25 firmi.

POSLOVNE VIJESTI ≡



ŠVICARSKA KOMPANIJA ĆE GRADITI POGON NA ILIDŽI KOD SARAJEVA



TRADE WINDS FORUM – JUGOISTOČNA EUROPA 2017



...I JOŠ FIPA POSLOVNIH VIJESTI...



ŠVICARSKA KOMPANIJA ĆE GRADITI POGON NA ILIDŽI KOD SARAJEVA

Forster Rohner, švicarska kompanija iz oblasti tekstilne industrije, će gradi pogon na Ilidži. Pogone posjeduje u Kini i Rumuniji, no za širenje i otvaranje najnovijeg pogona koji će šiti proizvode za glavnu fabriku, odabrana je Ilidža, kod Sarajeva.

Za početak, Forster planira zapošljavanje 15 do 20 osoba.



TRADE WINDS FORUM – JUGOISTOČNA EUROPA 2017

“Trade Winds Forum – jugoistočna Europa” će se održati u Bukureštu, Rumuniji od 18. do 20. oktobra 2017. godine. Ovaj događaj je značajna prilika za povezivanje sa potencijalnim partnerskim kompanijama iz SAD i predstavnicima američkih ambasada iz cijelog regiona. “Trade Winds Forum” je jedna od najvećih trgovinskih misija pod vodstvom američke vlade, sa ostvarenih više od 240 miliona dolara izvoza američkih kompanija u poslednjih deset godina.

Učesnici foruma mogu iskoristiti slijedeće mogućnosti:

- Učestvovati na fokusiranoj konferenciji o poslovnom razvoju, sa naglaskom na mogućnosti i izazove u regionu.
- Prisustvovati događajima s velikom vidljivošću sa ključnim liderima iz biznisa i vlada.
- Upoznati se jedan-na-jedan sa predstavnicima komercijalnih odjela američkih ambasada sa više od 25 europskih tržišta koji vas mogu povezati sa potencijalnim trgovinskim partnerima i pomoći vam da prilagodite svoju tržišnu strategiju.

Da biste saznali više o “Trade Winds Forumu”, posjetite web stranicu američkog Ministarstva Trgovine na: <http://2016.export.gov/TradeWinds/conference/index.asp> ili se direktno obratite g. Edhemu Brankoviću u Ambasadi SAD u Sarajevu na email BrankovicE@state.gov ili g. Spomenku Guzijanu na email GuzijanS@state.gov u predstavništvu Ambasade SAD-a u Banja Luci za više informacija o registraciji i /ili pridruživanju regionalnoj delegaciji u Bukureštu. Forum je otvoren kako za kompanije iz SAD tako i za lokalne kompanije iz regije. Cijena i rokovi za registraciju variraju u zavisnosti od kompanije i mogu se potvrditi kontaktiranjem američke ambasade direktno.



SEDMICA IZVOZA U ISTANBULU

U periodu od 31. oktobra do 2. novembra 2017 godine u Istanbulu održati „SEDMICI IZVOZA 2017“. U okviru pomenute sedmice u periodu od 30. oktobra do 3. novembra 2017 godine će se održati Buyer Mission Program za predstavnike kompanija. Tokom programa planirano je održavanje više panela pod nazivima „Izvan intelektualnih granica u tehnologiji“, „Izvan fizičkih granica u trgovini“, „Izvan društvenih granica u kulturi“ kao i bilateralni razgovori sa turskim privrednicima.

Učesnicima (po jedan predstavnik iz kompanije) gore pomenutog Programa biće plaćeni troškovi smještaja sa doručkom. Učesnici programa su obavezni poznavati jedan od tri strana jezika engleski, njemački ili francuski. Također, učesnici programa trebaju posjedovati ovlasti za odlučivanje u kupovini.

Zainteresirane kompanije mogu aplikacione formulare dostaviti Trgovinskom uredu Ambasade Republike Turske u BiH najkasnije do 13. oktobra 2017 godine na broj faksa: 033/208-562, ili putem maila saraybosna@ekonomi.gov.tr, nakon čega će biti kontaktirane samo one kompanije koje budu izabrane za učešće u gore pomenutom Programu.



MISIJA FIPA-E

Agencija za unapređenje stranih investicija Bosne i Hercegovine je agencija koju je osnovalo Vijeće ministara Bosne i Hercegovine, a čija je osnovna zadaća :

- Privlačenje i povećanje priliva stranih investicija u Bosnu i Hercegovinu i poticanje postojećih investitora u zemlji na dalja ulaganja i širenje poslovanja
- Poboljšanje saradnje između privatnog i javnog sektora, predlaganje mjera za unapređenje okruženja za investiranje, a s time i ekonomskog razvoja
- Predstavljanje Bosne i Hercegovine kao zemlje poželjne za strane investitore



USLUGE FIPA-E

Vijeće ministara Bosne i Hercegovine je zadužilo Agenciju za unapređenje stranih investicija da pruži podršku direktnim stranim investicijama i da olakša priliv stranih ulaganja u našoj zemlji. Agencija saraduje s institucijama vlasti i investitorima, te pomaže nadležnim vlastima da poboljšaju zakonski okvir za strana ulaganja. FIPA takođe pomaže investitorima da uspostave kontakte s javnim i privatnim sektorima BiH. Pokazatelji koji se odnose na priliv investicija, uspostava kontakata i studije privrednih sektora koje su izradili FIPA stručnjaci i nezavisni konsultanti, omogućavaju da investitori budu u potpunosti informirani o investicijskim mogućnostima koje Bosna i Hercegovina trenutno nudi. Osim toga, FIPA usko saraduje i sa ambasadama i diplomatskim predstavništvima Bosne i Hercegovine, koji takođe mogu pomoći investitorima da istraže mogućnosti ulaganja u našoj zemlji.

FIPA pruža informacije, analize i savjete potencijalnim investitorima o poslovnom i investicijskom okruženju, uključujući:

- zakonodavstvo koje se odnosi na direktna strana ulaganja
- podsticaje koji se odnose na ulaganja
- ekonomska i poslovna kretanja u zemlji

FIPA identificira i predstavlja postojeće bh. mogućnosti za strana ulaganja :

- investicijske projekte u fazi razvoja ili projekte koji su već spremni za realizaciju
- preduzeća u procesu privatizacije
- domaće firme koje traže stranog poslovnog partnera

FIPA pruža pomoć potencijalnim investitorima i onima koji su već investirali u zemlji kroz :

- saradnju s javnim i privatnim sektorom
- saradnju s vladinim i nevladinim institucijama kako bi se olakšao privredni razvoj
- saradnju s lokalnim, regionalnim i međunarodnim organizacijama kako bi se poboljšalo okruženje za ulaganja



DA BISTE SAZNALI VIŠE O USLUGAMA FIPA-E, KOJE SU BESPLATNE, KONTAKTIRAJTE NAS DIREKTNO.

Grbavička 4
71000 Sarajevo
Tel: +387 22 278 080
Fax: + 387 33 278 081
e-mail : fipa@fipa.gov.ba
www.fipa.gov.ba

Ured FIPA-e Mostar
Kneza Višeslava, Office 54
88000 Mostar
Tel/Fax: +387 36 558 815
E-mail: mostar@fipa.gov.ba

Ured FIPA-e Banja Luka
Jovana Surutke 13/III
78000 Banja Luka
Tel/Fax: + 387 51 226 180
E-mail: banjaluka@fipa.gov.ba

A map of Europe with white outlines of countries on a blue background. The country of Bosnia and Herzegovina is highlighted in the colors of its flag: yellow, blue, and white with stars.

INVEST IN BOSNIA AND HERZEGOVINA YOUR NEW OPPORTUNITY

WWW.FIPA.GOV.BA